

दिनांक 12.04.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- लोकसभा अध्यक्ष ओम बिरला खबरनवीसां ऊं जनता री परेशानियां सामी लावण बाबत् कह्यो।
- केन्द्रीय मंत्री भूपेन्द्र यादव लोगां ऊं बत्ता ऊं बत्ता पौधा लगावण री अपील कीनी।
- प्रदेश री स्कूलां मांय बच्चां ने उनाळा रे दौरान शरीर मांय पाणी री कमी ऊं बचावण सारू खास पहल— पाणी पीवणो याद दिरावण सारू केई दफा घंटी बजायी जावेला।
- आज हनुमान जयंती रे मौके प्रदेश मांय आस्था अर भक्ति रो माहौल—मिन्दरां मांय मोटी तादाद मांय जातरू पूग्या।

000

लोकसभा अध्यक्ष ओम बिरला कह्यो है के खबरनवीस लोकतांत्रिक प्रक्रिया रा सजग पहरेदार व्हे है। श्री बिरला आज ग्रेटर कोटा प्रेस क्लब कानी ऊं राख्यी ज्या नवसंवत्सर स्नेह मिलन समारोह मांय बोल रह्या हा। वे कह्यो के आ लोकतंत्र री ताकत है के न्यारा—नयारा नज़रिया वाळा लोग ई चर्चा अर बातचीत रे ज़रिए तालमेल बिठा र काम करे है। लोकसभा अध्यक्ष खबरनवीसां ने आम आदमी री आवाज बताया।

-----

कार्यक्रम मांय ऊर्जा मंत्री हीरालाल नागर अर विधायक संदीप शर्मा ई मौजूद रह्या।

000

अलवर रा सांसद अर केन्द्रीय मंत्री भूपेन्द्र यादव आज सांसद संपर्क संवाद कार्यक्रम री सुरुआत कीनी। ई रा तैत वां रो 14 अप्रैल ताई अलवर री न्यारी—न्यारी ग्राम पंचायतां रो दौरा कर र जनता सागे बातचीत करण रो कार्यक्रम है। श्री यादव आज मोहब्बतपुर ग्राम पंचायत मांय राख्यी ज्यी जनसभा मांय लोगां ऊं पीएम सूर्य घर योजना रो फायदो लेवण री अरज कीनी। वे मोट्यारां ऊं टी. बी. उन्मूलन कार्यक्रम मांय निःक्षय मित्र बण र मदद करण बाबत् ई कह्यो। श्री यादव जनता ऊं बत्ता ऊं बत्ता पौधा रोपण री अपील कीनी।

-----

0000

उपमुख्यमंत्री डॉ. प्रेमचंद बैरवा आज सिरोही जिला रा आबू रोड कने मानपुर मांय बाबा साहेब भीमराव अम्बेडकर री मूरत रो अनावरण कीनो। अम्बेडकर सेवा समिति री ओर ऊं राख्यी ज्या कार्यक्रम मांय वे कह्यो के बाबा साहेब ता—उम्र वंचित तबका री जनता रा भला सारू काम कीनो। उपमुख्यमंत्री सगळा ऊं बाबा साहेब रा सिद्धांतां माथे चालण री अपील कीनी।

-----

बाबा साहेब डॉ. भीमराव अम्बेडकर री जयंती रा सिलसिला मांय प्रदेश मांय ई न्यारा-न्यारा कार्यक्रम राख्या जा रह्या है। केबिनेट मंत्री जोराराम कुमावत पाली जिला रा तखतगढ़ मांय बाबा साहेब री मूरत रो अनावरण कीनो। आज पाली मांय ईलाज रो शिविर लगायी ज्यो अर केई होड़ां राख्यी ज्यी।

000

झालावाड़ ई अब हवाई सेवा ऊं जुड़ ग्यो है। वठे नुवा बण्या पंडित दीन दयाल उपाध्याय हवाई अड्डा ऊं आज हवाई जहाज दिल्ली सारु उड़ान भरी। राज्य री पैली वाळी मुख्यमंत्री वसुंधरा राजे अर झालावाड़ रा सांसद दुष्यंत सिंह ई इण मांय सफर कीनो। झालावाड़ हवाई अड्डा रा 3 हजार 120 मीटर लम्बा रन वे माथे बोइंग 747 जंबोजेट ई आसानी ऊं उतर सके है।

000

प्रदेश री अदालतां मांय सुणवाई रो टेम 15 अप्रैल ऊं बदल जावेला। हाईकोर्ट मांय संवारे 8 ऊं दोपहरां पाछे 1 बजां ताई जद के नीचली अदालतां मांय संवारे 8 ऊं दोपहरां पाछे साढ़े बारह बजां ताई कामकाज व्हेला। अदालत मांय कामकाज रो ओ बगत 27 जून ताई रेहवेला। उनाळा रे कारण राजस्थान हाईकोर्ट अर नीचली अदालतां मांय कामकाज रो बगत बदली करी ज्यो है।

000

प्रदेश री स्कूलां मांय उनाळा मांय बच्चां ने पाणी री कमी ऊं बचावण सारु खास पहल करी जा रही है। ई रा तैत स्कूलां मांय घंटी बजा र विद्यार्थियां ने पाणी पीवण सारु छुट्टी दी जावेला। शिक्षा मंत्री मदन दिलावर सोशल मीडिया रे जरिए आ जाणकारी दीनी। वे मांड्यो के जोरदार तावड़ा सागे लू बाजण री शंका ने ध्यान राखता थकां बच्चां ने बार-बार पाणी पावण माथे जोर दियो जावेला। वे कह्यो के ई सारु स्कूलां मांय पीवण रा साफ पाणी री व्यवस्था तैय करी जावेला। शिक्षा विभाग रा विशिष्ट शासन सचिव विश्व मोहन शर्मा सगळा जिला कलेक्टरां ने खत लिख र उनाळा मांय स्कूलां मांय पीवण रा पाणी, लू ऊं बचाव सारु ओ आर एस रा घोळ मुहैया करावण अर दूजी व्यवस्थावां तैय करण रा हुकम दीना। म्हाणा बाड़मेर खबरनवीस बतायो के उनाळा मांय स्कूलां मांय पीवण रा पाणी री व्यवस्था सागे ई लू ऊं बचाव सारु ओ आर एस रा घोळ रा किट अर दूजी जरूरी व्यवस्थावां करी जा रही है।

-----

000

राज्य मांय लारला दो-तीन दिन मांय पारो थोड़ो उतरण ऊं गर्मी ऊं साता मिली है। घणखर ठौड़ां दिन अर रात री बगत तापमान मांय 3 डिग्री सैल्सियस ताई री गिरावट दर्ज करी ज्यी। ई बीचे आज कोटा मांय अधिकतम तापमान साढ़े 42 डिग्री सैल्सियस दर्ज करी ज्यो। चूरु अर पिलानी मांय अधिकतम तापमान साढ़े 41 डिग्री सैल्सियस रह्यो। मौसम विभाग आज जैसलमेर, बीकानेर, बाड़मेर, श्रीगंगानगर, जयपुर, टोंक, बूंदी, बारां, कोटा, झालावाड़ अर आरे-सारे रा हलकां सारु ऑरेंज अलर्ट जारी कीनो है। आं ठौड़ां आंधी चालण अर गरज सागे बौछारां पड़बा री संभावना है। 14 अप्रैल ऊं राज्य मांय ओजू गर्मी तेज व्हेवण सागे लू बाजण रा आसार है।

000

राज्य सरकार पीएम-कुसुम योजना ने असरदार तरीका ऊं लागू कर रही है। इण रो मकसद किसानां ने माली तौर ऊं खुद रे पाण ऊबा करणा अर सूरज री रोशनी ऊं बणायी ज्यी बिजली काम लेवण ने बधावो देवणो है। पेश है एक रपट —

-----

000

प्रदेश मांय आज हनुमान जयंती रे मौके आस्था अर भक्ति रो माहौल बण्योड़ो है। भरतपुर, सवाईमाधोपुर, बारां, धौलपुर, बाड़मेर अर जयपुर समेत केई ठौड़ां शोभायात्रा निकाळी ज्यी। ई सागे ई केई ठौड़ां भण्डारा लगायी ज्यो अर प्रसाद बांटी ज्यो। न्यारा-न्यारा हनुमान मिन्दरां मांय दर्शन

करण सारू मोटी तादाद मांय जातरू पूग रह्या है। जयपुर कने चौमूं रा सामोद वीर हनुमान मिन्दर मांय ई संवारे ऊं ई जातरूआं री लम्बी लेणां निजर आ रही है। चूरू ज़िला रा सालासर बालाजी धाम मांय चाल रह्या मेळा मांय ई मोटी तादाद मांय जातरू पूग रह्या है। पाली ज़िला रा डेंडा गांव मांय भर्या हनुमान जन्मोत्सव मेळा मांय आरे-सारे रा गांवा ऊं मोटी तादाद मांय लोग पूग्या। राज्यपाल हरिभाऊ बागडे जयपुर रा खोले के हनुमान जी मिन्दर मांय “श्री हनुमन्त जन्मोत्सव” आरती समारोह मांय सिरकत कीनी। मुख्यमंत्री भजन लाल शर्मा जयपुर रा सिद्धेश्वर हनुमान मिन्दर मांय पूजा कर र पूजा-अर्चना कीनी अर प्रदेश री जनता री सुख-समृद्धि अर कल्याण री कामना कीनी। आज ई भक्ति आंदोलन रा खास संत पीपाजी री 702वीं जयंती मनाई जा रही है। ई मौके बाड़मेर अर पाली समेत केई ठौड़ां शोभा यात्रा निकाळी ज्यी।

झालावाड़ रा गागरोन किला रा पीपाजी धाम मांय खास पूजा-अर्चना अर भजन-कीर्तन रा कार्यक्रम राख्यी ज्या।